

KINDERKERK LES: Waar alles begin het

Doel van les:

- Ons gesels oor hoe alles begin het, die eerste sonde en God se reddingsplan vir die mens.

Leiers bring asb julle Bybels saam!

1. YSBREKER:

- Elke groep kry 'n bondel klei waaruit hulle iets rondom die skepping saam as groep moet maak.
- bv. olifant, boom, blom, vis, maan en sterre, son, man, vrou ens.

2. IN DIE BEGIN:

Wie kan raai waarom ons vanaand gaan gesels? Die skepping! (Met skepping bedoel ek alles wat God aan die begin gemaak het soos bv, die aarde, sterre, diere, die bome en die mens.) Elke groep het nou iets uit die skepping uit klei gemaak, met julle hande. Kom ons kyk HOE God geskep het, en WAT Hy geskep het.

- *Sit AL die ligte in die vertrek af....*
- Gen 1:1-3 "In die begin het God die hemel en die aarde geskep. Die aarde was heeltemal onbewoonbaar (dit beteken niemand kon op die aarde bly nie), dit was donker op die water, maar die Gees van God het oor die waters gesweef. Toe het God gesê: "Laat daar lig wees!" En daar was lig....."
- *Sit die ligte aan*
- So het God dan begin met die skepping. Hy het elke dag iets gemaak, daarna gekyk en gesê dat dit goed was.

DIE SKEPPING: Groepwerk Kompetisie

Elke groep kry 'n stel prente met wat op die verskillende dae van die skepping gemaak is, hulle moet lees wat God gemaak het, en dan so vinnig soos hulle kan die prente in die regte volgorde rangskik. Gebruik God skep die wonderlike wêreld leesstuk hiervoor.

LEESSTUK: God skep die wonderlike wêreld

In die begin, toe God begin het om die hemel en die aarde te maak, het die aarde geen vorm gehad nie. Die Gees van God het oor die donker waters gesweef. "Laat daar lig wees!" het God gesê. Toe kom daar lig, en God het die lig en die donker geskei. Hy het die lig "dag" genoem, en die donkerte "nag". Dit was die eerste dag.

"Laat die blou lug en die water van mekaar skei," het God gesê, en toe het die lug en die oseane gevorm. Dit was die tweede dag.

"Laat die water en die land van mekaar skei," het God gesê, en die droë grond "land" genoem, en die water "see". God was tevrede. Hy het ook gras en plante laat groei, en bome wat saad gee. Dit het alles op die derde dag gebeur.

Op die vierde dag het God die son, die maan en die sterre gemaak. Die son het bedags geskyn en die maan en die sterre snags. God was tevrede met Sy handewerk.

Op die vyfde dag het God visse en voëls geskape, en op die sesde dag al die ander lewende diere. Hy was ook hiermee tevrede. Op die sesde dag het God ook die eerste mens, Adam en sy vrou, Eva, gemaak.

God het toe die man en vrou in 'n pragtige tuin laat bly wat Eden genoem is. Hulle moes vir God die tuin en die diere oppas. Nadat God alles geskape het, het Hy op die sewende dag gerus. Hy was tevrede met Sy werk en met die spesiale rusdag. God het hierdie dag heilig genoem, want dit was die dag waarop Hy gerus het van al Sy werk.

Verhaal genaam uit Gunsteling Bybelverhale vir kinders, bl 16-17, V. Gilbert Beers en Ronald A. Beers

DIE SKEPPING: Groepwerk

Die skepping is een van die wonderlikste dele in die Bybel om te lees. Dink daaraan dat dit is waar ons leer hoe alles begin het soos hoe die sterre en die maan gemaak is en waar die diere vandaan kom. Tog lees ons soms net baie vinnig oor dit en vergeet net so vinnig as wat ons gelees het wat gebeur het. Of ons dink dalk dis boring en lees dit glad nie. Gebruik die vrae oor die skepping om saam as groep meer oor die skepping te leer.

Groepwerk vrae:

Gee vir elke groep die uitdeeltuk met woorde wat ontbreek asook die prentjies. Die leiers lees die gedeelte in die Bybel en die kinders moet die regte prentjie kies wat in die sin pas.

1. God het die aarde met alles daarop gemaak deur te _____ (Gen 1:3).
2. God het die aarde met alles daarop in _____ dae gemaak (Gen 1:31).
3. Nadat God alles gemaak het, het Hy op die _____ dag _____ (Gen 2:2).
4. Nadat God alles gemaak het, het Hy gesê dit was _____ (Gen 1:31).
5. God het die mens uit die _____ van die aarde gemaak en lewensasem in sy neus geblaas (Gen 2:7).
6. God het die vrou uit die _____ van die _____ gemaak (Gen 2:21-22).

3. EN TOE IS DIT NIE MEER GOED NIE

YouTube video: <https://youtu.be/jKdb64RiLVE> (3:30min)

In die video het ons gehoor dat God 'n plan gehad het om vir Adam en Evan (die mens) te red nadat hulle sonde gedoen het. Kom ons kyk gou wat hierdie plan was....

Hiervoor gaan ek 'n boks gebruik wat mooi oorgetrek is, met 'n deksel wat kan afhaal. Binne in die boks is 'n klomp gemors, en dan ook 'n kruis.

Kyk hoe mooi is hierdie boks, dit laat ons amper dink aan hoe mooi die Tuin van Eden moes gewees het met die pragtige bome en plante en die diere.

Ons het nou gehoor dat die oomblik toe Adam en Eva van die vrug van die boom in die middel van die tuin eet, hulle albei se oë oopgegaan het....(haal die deksel van die boks af en begin die gemors uit die boks uithaal - soos jy dit uithaal noem jy dit gagga, aaklig, gross, yucky, gemors, al die woorde wat sonde beskryf). Die oomblik toe Adam en Eva nie na God geluister het nie, het sonde in die wêreld ingekom.

Hulle oë het wel oopgegaan soos die satan gesê het, maar dit was nie vir die mooi en die goeie goed nie, maar vir dood en sleg.

God was kwaad en hartseer oor wat die mens gedoen het, en het hulle uit die Tuin van Eden gesit, want daar was nog 'n boom in die Tuin met die naam "Boom van die Lewe". God wou nie hê dat hulle van hierdie boom moes eet nie, want dan sou hulle vir altyd in sonde gebly het. Daarom het Hy hulle uit die Tuin van Eden gesit en die tuin deur gerubs (engele) met vlamme swaarde wat heen en weer beweeg laat oppas sodat hulle nie sou kon teruggaan nie.

Sonde het gevolg:

Daar is nou 'n sonde probleem (wys die gemors in die boks), en daarvoor is daar gevolg, want daar is ALTYD gevolg vir sonde. Kom ons praat gou oor gevolg.

Dit kan bv. wees wanneer mamma of pappa vir my sê om my kamer skoon te maak en as jy nie luister nie, neem hulle 'n speelding weg of ek mag nie televisie kyk nie. Ons kan ook byvoorbeeld sê dat as jy nie jou huiswerk doen nie en juffrou dit sien, kry jy uitskryfwerk of 'n swart kol. Dit is die gevolg van nie jou huiswerk doen nie.

Groepwerk: Lees gou as groep Gen 3:14-19 en kyk wat die gevolg vir die mens en ook vir satan was!! Ja, glo dit as jy wil, wat satan gedoen het, het ook gevolg vir HOM gehad!!!

Genesis 3:14-19 Die Here is hartseer:

Die Here was baie hartseer oor wat gebeur het. Hy het vir die slang gesê: "Van nou af sal dit met jou sleg gaan omdat jy dit gedoen het! Anders as al die ander diere, sal jy van nou af op jou pens seil. Jy sal stof eet so lank jy lewe. Van nou af sal mense niks van jou hou nie. Hulle sal sommer jou kop papslaan as hulle jou sien! En jy sal hulle aan die hakskeen byt as hulle by jou verbyloop."

Vir die vrou het die Here gesê: "Van nou af sal jy baie pyn hê wanneer jou babatjies gebore word. Jy sal jou man al hoe nodiger kry. Jy sal nie sonder hom kan lewe nie. Boonop sal jy na hom moet luister, al is jy nie regtig lus daarvoor nie."

Vir die man het die Here gesê: "Jy was regtig ongehoorsaam. Jy het na jou vrou geluister en nie na My nie. Jy het geëet van die vrugte terwyl Ek mos duidelik gesê het jy mag dit nie doen nie! Omdat jy so ongehoorsaam was, gaan die hele aarde van nou af swaar kry. Jy sal baie hard moet werk om aan die lewe te bly. Allerhande soorte bossies gaan opkom en die lewe vir jou moeilik maak. Jy sal moet werk dat die sweet loop. Uiteindelik sal jy doodgaan. Jou liggaam sal weer grond word, want jy is mos net van grond gemaak!"

Gedeelte geneem uit die Bybel@kinders.co.za, bl15, Redakteur Hennie Stander

Wat het ons in hierdie stukkies gehoor oor gevolg?

- Die slang sal seil op die grond en mense sal nie van slange hou nie.
- Vrouens sal met baie pyn babatjies hê.
- Die aarde sal nie meer 'n perfekte plek wees soos in die Tuin van Eden nie. Die man sal hard moet werk.
- Die mens sal nou doodgaan.

Weet julle dat tussen al die gevolge, het ek gehoor dat God 'n plan vir ons gemaak het? Het julle dit gehoor?

Die Reddings plan:

Wat is die plan?

God het in Gen 3:14; 16-19 nie net vir die mens en satan vertel wat hulle straf sou wees nie, maar ook dat Hy 'n plan sou maak om die mens, wat nou sonde het, te red.

In Gen 3:15 sê God vir die slang dat hy die vrou se seun in die haakskeen sou byt.... maar dat die vrou se seun die slang se kop sou papslaan.

WIE is die Seun van die vrou waarvan God hier praat? (haal die kruis uit die boks uit). Die Seun is Jesus wat gekruisig sou word vir ons sondes. En Jesus sou die satan se kop papslaan wanneer Hy aan die kruis hang, en na drie dae opstaan uit die dood. So het Jesus die dood en die satan gewen.

Wat beteken dit vir my en jou?

Ek en jy is vol sonde gebore, maar ons hoef nie so te bly nie, want God het 'n Plan om ons te red vir ons gemaak. As ons Jesus Christus in ons harte innooi, dan hoef ons nie vir 'n ewigheid saam met satan in die hel te wees nie.

Sonde kan baie lekker lyk, maar dis eintlik gagga. Almal het 'n sonde probleem. Jy kan kies om die vuil gemors in die boks te hou, jou lewe so te leef, en die gevolge van jou sondes te dra (sit die vuil goed in die boks).

OF jy kan kies om die gemors uit die boks te haal, jou lewe vir Jesus te gee (haal die gemors uit die boks en sit die kruis in die boks) en nie self die straf vir jou sondes te dra nie, want Jesus het dit klaar vir jou aan die kruis gedoen.

Hierdie is 'n keuse wat NET jy kan doen. As jy nog nie jou hartjie vir Jesus gegee het nie en jy wil graag, kan jy agterbly en ons sal jou help.

Sluit af met gebed in groepe.

SKEPPING: Groepwerk vrae

Gee vir elke groep die uitdeeltuk met woorde wat ontbreek asook die prentjies. Die leier lees die gedeelte in die Bybel vir hulle groep en die kinders moet die prentjie vind wat in die sin pas.

1. God het die aarde met alles daarop gemaak deur te _____ (Gen 1:3).
2. God het die aarde met alles daarop in _____ dae gemaak (Gen 1:31).
3. Nadat God alles gemaak het, het Hy op die _____ dag _____ (Gen 2:2).
4. Nadat God alles gemaak het, het Hy gesê dit was _____ (Gen 1:31).
5. God het die mens uit die _____ van die aarde gemaak en lewensasem in sy neus geblaas (Gen 2:7).
6. God het die vrou uit die _____ van die _____ gemaak (Gen 2:21-22).

Antwoorde:

1. Praat
2. 2. Ses
3. 3. Sewende / gerus
4. 4. goed
5. 5. stof
6. 6. Ribbebeen / mens

